

S **LO**
Afl. 1.25

BRIYANDO FUERTE • TRECIENDO CLARIDAD
DIABIERNA 17 MEI 2024

Di Pueblo

SOLO SALUD

**BO TA PASANDO DEN BO MENOPAUSA
ALGUN TIPS CU POR YUDA BO DEN E
FASE TRANSITORIO AKI**



WWW.SOLODIPUEBLO.COM



SOLODIPUEBLO@GMAIL.COM

**HOF A SEÑALA CU
SUSSEBEEK A HAYA 11
TERENO FOR DI BENNY
SEVINGER Y A BENDE
UN TERENO PA 2.4
MIYON FLORIN**

**TRES CUIDADOR DI
PRESO SOSPECHA
DI A PASA DROGA
DEN KIA DILANTI
HUES**

**PRESIDENTE DI FUNDACION
AUTISMO ARUBA A REUNI CU
PROME MINISTER**


Lo crea un maneho nacional
na bienestar di e comunidad autista



IBiSA ta informa
**ATENCION PA BO
PRESION RIBA DIA MUNDIAL
DI PRESION HALTO**



**OLA DI CALOR TA
PELIGROSO PA
ADULTONAN MAYOR**





Noticia di Corte

CASO AVESTRUZ

Bendemento di terenonan na Eagle Beach pa 3.8 miyon dollar trata den Corte Superior

ORANJESTAD – Awe mainta te den oranan di atardi, Hof di Corte Superior a dedica na interrogacion di sospechosonan di bendemento di tereno erfpacht cu a haya di Gobierno. Den e articulo aki ta dedica na e caso di bendemento di terenonan na Eagle Beach na razon di 3.8 Miyon Dollar. E sospechonan ta Gaby Werleman, su señora Nuñez y Carlo Mansur. SOLO DI PUEBLO por a compronde cu Hof a señala cu Benny Sevinger, minister di AVP, tabata firma documentonan sin controla.

TERENONAN NA EAGLE BEACH

Hof a mostra cu Werleman y Nuñez a haci peticion na Gobierno AVP na 2014 pa un tereno na Eagle Beach pa realisa un proyecto di apartamento pa turista. E proyecto ta yama Damira. Hof a mostra cu envez di a haya un tereno di 3 mil meter cuadra manera a pidi, Werleman y Nuñez a haya un tereno mucho mas grandi.

Mansur, cu a pidi un tereno tambe na Eagle Beach di mas o menos 5 mil meter cuadra, a haya un tereno di 4250 meter cuadra. E proyecto ta yama Lizner.

Hof a mostra cu for di investigacion di Landsrecherche ta sali na cla cu dia 10 December 2014, Werleman di Damira a haci peticion y algun dia despues, 12 December 2014 Sevinger a aproba e peticion. Dia 24 September 2015 a uni dos protectonan Damira y Lizner. Ta asina cu e proyectonan aki a wordo bendi hunto pa 3.6 miyon dollar y a reparti esaki entre Werleman, Nuñez y Mansur. Gaby Werleman a splica Hof cu e tin 3 proyecto di apartamento y tabata kier un proyecto pa turismo na Eagle Beach. E tabata kier mas o menos 3 mil meter cuadra pa un compleho di 15 apartamento.

HOF CU PREGUNTANAN SKERPI

Hof a puntra pakico, Werleman a

haya mas tereno cu loke el a pidi. Segun Werleman, e no a puntra pakico. Hof a puntra Benny Sevinger, kende a bisa Hof cu esey ta decision di DIP cu a midi tereno caba. Hof a remarca pakico un dama cu a pidi 1500 meter cuadra y despues 3 mil meter, no a haya pero Werleman si. Sevinger a bisa cu e no sa y cu esey ta maneho di DIP.

Nuñez a bisa cu formal e tabata director di Damira. Nan kier a traha un compleho di apartamento. Ora e tereno a bira mas grandi su casa Werleman a bisa pa busca un partner. Werleman a busca otro inversionista, Henriquez di Spacio. Werleman a bisa Hof cu e y Nuñez tabata director y despues a forma e NV. El a bisa cu Nuñez tabata mas encarga cu e administracion.

Ta asina cu Werleman tabata consehero di Gobierno AVP y Benny Sevinger.

Hof a cuminsa haci Mansur preguntanan y Mansur a bisa cu e no tin contacto priva cu Sevinger manera Landsrecherche ta bisa sino relacion comercial. Mansur a bisa Hof cu el a duna declaracion bon cla na Landsrecherche. Hof a puntra si e kier papia y Mansur a para riba cu e ta para tras di su declaracion.

TERENONAN A WORDE REGLA CU URGENCIA

Hof a mostra cu e hefe na DIP a haya straño cu e peticion a wordo firma asina liher. Normal ta tarda hopi. Segun Sevinger, e ta firma peticionnan normal. Hof a mostra cu un dama a declara cu e tabatin combersacion cu Werleman kende a bisa cu e por yud'e cu tereno si e haya 5 por ciento. E dama a nenga di paga. Werleman a bisa Hof cu no ta berdad.

Hof a mostra cu tabatin stempel “spoed” riba e peticionnan. Segun e hefe di DIP, ta minister Sevinger so ta haci esey. Segun Sevinger, ta na DIP ta haci esaki. El a bisa cu esey a sosode promer cu su

tempo y ainda e ta mira e stempel “spoed” riba peticionnan.

Hof a mostra cu Landsrecherche tin un decreto di minister firma pero sin fecha pa e proyecto. Sevinger a bisa cu e no sa di esey. Ta asina cu Werleman a paga pa e opcion di tereno pa Mansur. Hof a puntra pakico. Segun Werleman el a fia Mansur e placa. Hof a reacciona pakico Werleman a paga y no Mansur mes. Ta asina cu Mansur a bin cu e comprador Donati pa e dos proyectonan.

MINISTER TA FIRMA SIN CONTROLA

Hof a puntra Sevinger con por ta cu Sevinger ta firma peticionnan y cartanan di DIP sin sa kico ta contenido di esaki. Segun Sevinger el a encarga tur cos na DIP y loke DIP dicidi e ta firma. Hof a remarca cu Sevinger no ta controla nada ni promer ni despues si ta duna tereno. Hof ta haya cu esey ta un risico cu Sevinger ta tuma di firma cosnan sin sa. Segun Sevinger, pesey e tin e departamentonan cu e ta confia. Hof a remarca cu Abath a bisa cu nan no ta haci nada sin Sevinger ta na altura.

Hof a mostra Sevinger e peticionnan di Demira y Lizner caminda el a aproba esaki y manda pa DIP. Hof ta haya straño cu Sevinger ta djis firma sin mira e contenido. Segun Sevinger e ta bay di acuerdo cu e peticionnan y ta DIP tin cu dicidi.

CARTA CU INFORMACION FALSO

Hof a mostra riba un carta di Damira cu lo busca inversionista

pa participa den e proyecto mientras cu Donati ta papia di cumpra e proyecto. Nuñez a bisa Hof cu e abogado a traha e carta y el a firma. Hof a remarca cu si firma, e ta responsabel pa esaki. Hof a bisa cu aki ta trata di mas cu 3 Miyon Dollar. Hof ta haya cu esaki ta duna informacion falso di loke realmente tabata sosodiendo. Abogado mr. Oomen di Werleman y Nuñez a mostra Hof cu tin un otro carta caminda ta splica con e bendemento di e proyecto a tuma lugar y traspaso di accionnan. Hof a remarca cu e cartanan ta mostra cu ta un proyecto ta wordo lanta, siendo cu Donati ta bisa cu el a cumpra e proyecto. Hof a remarca cu dia 9 December 2016 Abath a declara na Landsrecherche cu Sevinger a aproba e bendemento di e proyectonan na Donati siendo cu e traspaso di accionnan a sosode 8 December 2016, un dia promer. Abath ta señala cu minister Sevinger a tuma decision riba traspaso di proyecto, sin cu DIP a tuma un decision riba esaki. Segun Abath, DIP lo tabata kier sa, kende lo tuma e proyecto y otro informacionnan.

Sevinger a bisa Hof cu su maneho tabata pa proyectonan keda realisa mas liher pa drecha economia. Hof a remarca cu si a laga Donati paga 24 mil florin pa e opcion, e lo tabatin mas placa pa inverti den e proyecto cu a laga Donati paga 3.6 miyon dollar. Sevinger a bisa Hof cu esey ta asunto di esnan cu a bende y e no tin nada di bisa den esey.

Clasificados

SOLODIPUEBLO@GMAIL.COM
CEL. 585 9500



Noticia di Corte

HOF A SEÑALA CU SUSSEBECK A HAYA 11 TERENO FOR DI BENNY SEVINGER Y A BENDE UN TERENO PA 2.4 MIYON FLORIN

ORANJESTAD – Awe mainta Hof di Corte Superior a trata e caso den apelacion di Pieter Sussebeek. Benny Sevinger tambe mester a presenta.

SOLO DI PUEBLO por a compronde cu Hof a haci un cantidad di pregunta y cuestiona e forma di hiba maneho den dunamento di tereno bou maneho di AVP.

Hof a bisa cu e acusacion contra Sussebeek ta cu el a cumpra Sevinger door di traha cura di aluminium, cumpra un machine grandi di train y cumpra drip system pa Sevinger. Hof a mostra cu e acusacion ta bisa cu Sussebeek a haci esakinan pa asina haya terenonan erfpacht for di Sevinger. Tambe ta acusa Sussebeek di a laba 1.3 miyon dollar (2.4 Miyon Florin).

ACUSACION: SUSSEBECK A CUMPRASEVINGER

Hof a mostra cu desde 1987, Sussebeek a traha cu Gobierno. Desde 2010, el a traha como consehero di Sevinger den Gabinete Eman 1 y 2. Segun e acuerdo, Sussebeek tabata traha 40 ora pa siman y su oficina tabata na DOW pasobra no tabatin otro

oficina disponible.

Hof a puntra Sevinger con esaki tabata hinca den otro. Sevinger a bisa cu Sussebeek tabata na su disposicion y Sussebeek mester duna informacion di pensamiento den comunidad riba proyectonan cu lo ta andando. Ta asina cu Sussebeek y Sevinger ta hopi bon amigo. Nan ta considera otro como ruman.

Hof a mostra cu tin un mail di Sevinger pa Sussebeek caminda Sevinger ta pidi Sussebeek 5 Mil dollar pa paga e compania cu ta traha curanan di heki di aluminium na Miami. Sussebeek a usa su compania Pats pa paga e gastonan. Hof a mostra cu dia 9 September 2014, e compania Pats a paga e 5 mil dollar. Na Februari 2015, Pats a paga 3 mil dollar riba e cura di aluminium.

Segun Sussebeek, Sevinger a paga bek y a hiba e placa na su administracion. Hof a mostra cu na Landsrecherche Sussebeek a duna un otro declaracion cu ta Sevinger ta regla su asuntonan pa su mes. Hof a mostra cu e accountant di Sussebeek ta bisa cu Sussebeek a trece placa pa deposita riba su credit card pero

no a bisa cu e placa ta di Sevinger. Investigacion ta mostra cu dia 22 Januari 2015 tabatin un pago riba cuenta di Pats. Hof a mostra cu investigacion ta mostra cu no por saca afor cu ta Sevinger a haci e pago aki.

CUMPRADRIPSYSTEM

Hof a mostra cu Sussebeek lo a cumpra drip system for di Fantastic Garden pa Sevinger. Tabatin tres pago di Pats. Na December 2018, Pats a paga 2 mil florin na Fantastic Garden y e mesun dia 2 mil florin a wordo deposita riba cuenta di Pats. Na Maart 2016, Pats a paga 3 mil florin na Fantastic Garden y e mesun dia 3 mil florin a wordo deposita riba cuenta di Pats. Na Mei 2016, Pats a paga 3 mil florin na Fantastic Garden y e mesun dia 3 mil deposita riba cuenta Pats. Hof ta haya esaki hopi straño. Segun Sussebeek, señora di Sevinger a hiba placa na Pats y administracion a deposita esaki riba cuenta di Pats. Despues Sussebeek a firma cheque pa hiba Fantastic Garden. Hof a mostra cu Sussebeek a declara na Landsrecherche cu esaki por ta un fayto di administracion pasobra a deposita placa riba cuenta di e compania Pats y despues ta traha un cheque riba number di compania pa paga Fantastic Garden. Hof a remarca cu pakico no a hiba e placa mes cash y pakico e señora di Sevinger no a bay Fantastic Garden cu ta keda mas cerca di su cas cu core bay te na e compania Pats. Sevinger a bisa Hof cu door cu tur dia tin hopi hende ta bay na su cas, a dicide di traha un cura di aluminium. E motibo cu su señora no a bay Fantastic Garden ta pa evita cu hendenan lo bay acerke pa haya un cita cu Sevinger.

GYM DI 11 MIL DOLLAR PA SEVINGER

Hof a mostra cu un machine di train grandi, cu a wordo busca di Merca, a bay na cas di Sevinger

pa un gym. E compania Pats a paga 11 mil dollar pa e machine aki. E machine ta riba number di Sevinger y el a bestel esaki. Sevinger a bisa cu na 2017 e machine a bay su cas pasobra e no ta fit na cas di Sussebeek. Hof a remarca cu ora ta busca e machine, ta wak e grandura pa e por keda den e lugar. Segun Sussebeek, a haci un fayto cu calculacion. El a bisa Hof cu el a dicide cu e no kier pone e machine den su gym pasobra sino e lo mester kita otro machinenan cu e ta gusta train riba nan. Pesey e no a laga e machine yega su cas. A manda e machine na cas di Sevinger. Segun Sussebeek e intensio ta cu e machine di train lo bay na cas di su yunan cu actualmente ta bou construccio.

HAYA 11 TERENO

Hof a mostra cu durante Gobierno di AVP entre 2010 y 2017, 5 empresa di Sussebeek a haya 7 tereno y un a haya den opcion. Sussebeek a pasa un compania riba number di un ruman kende a haya un tereno. Tambe tin tereno cu Sussebeek a haya pa su mama y rumannan. En total ta trata aki di 11 tereno.

SUSSEBECK TA HAYA TUR COS DI SEVINGER

Hof a mostra cu for di investigacion di Landsrecherche ta sali na cla cu e hefe di DIP a señala cu Sussebeek ta haya tur cos for di Sevinger. Ta increibel con hopi tereno Sussebeek a haya. Hof a confronta Sussebeek cu e declaracion di e hefe di DIP. Segun Sussebeek esakinan no regalonan di Sevinger y tampoco e machine di train. Segun Sussebeek, for di 2006, e tabata pidi terenonan pero no a haya. Segun Sussebeek, e hefe di DIP mes, na 2010 cu Sussebeek a bolbe pidi e mesun tereno di 2006, el a aproba e peticion.

SEVINGER:

PAKICO

CONTINUA PAG. 4

HACI PAGO DI ABONEMENT ONLINE

TA POSIBEL:

APRECIABLE CLIENTELA, SI BO TA DESEA DI
HACI E PAGO DI ABONEMENT ONLINE,
E TA POSIBEL:

ESAKI TA NOS CUENTA:

SUNMAX PRINTERS - STA. CRUZ 110

BANCO: RBC

NUMBER DI CUENTA: 7700000100152447

**DI ANTEMANO,
MASHA DANKI.**

SOLO DI PUEBLO





Noticia di Corte

CONTINUACION PAG. 3

SUSSEBEEK NO POR HAYA TERENO

Hof a puntra Sevinger si e sa cu e compania Pats ta di Sussebeek. Sevinger a bisa Hof cu e no tabata sa. Hof a remarca cu si ta den serio Sevinger ta bisa esey, siendo cu Pats a paga cosnan pa Sevinger. Sevinger a bisa cu awor

e sa pero e no ta busca pa sa cual companianan ta di Sussebeek. Hof a remarca cu den e peticion di tereno ta para bon cla e companianan di Sussebeek.

Hof a puntra Sevinger, mirando cu Sussebeek ta su bon amigo, si e lo no mester tabata mas reserva cu duna tereno. Sevinger a bisa cu e no ta haya asina.

Un otro compania di Sussebeek

BPD ta di un yiu di Sussebeek. Hof a mostra cu aki tambe a haci peticion pa tereno na Eagle Beach di 3 mil meter. Sevinger a aproba e peticion y mand'e DIP pa worde ehecuta. Mahogany Residence, un otro compania di Sussebeek, tambe a haci peticion pa tereno na banda di Bubali plas. Landsrecherche a remarca cu ta straño cu promer cu e peticion a

yega, Sevinger a haya conseho di DOW 2 siman promer pa no duna e parcela pasobra tin riolering bou di dje. E mesun dia cu Sussebeek a haci peticion pa tereno, Sevinger a aproba y ta bisa cu e situacion ta ok y manda pa DIP pa ehecuta.

Hof a remarca cu tin varios prolongacion di opcion firma door di Sevinger siendo cu e palabracion di DIP ta, cu mester cumpli cu e exigencianan den 6 luna pa asina haya e erfpacht. Sevinger a bisa Hof cu hopi biaha ta prolonga e periodo pasobra companianan no ta keda cla cu tur e cosnan.

BENDE TERENO PA 2.4 MIYON FLORIN

Hof a sigui cu e investigacion di Landsrecherche cu ta muestra cu riba 10 December 2012 un

TRES CUIDADOR DI PRESO SOSPECHA DI A PASA DROGA DEN KIA DILANTI HUES

ORANJESTAD – Diabierna awor, 17 Mei 2024, den Corte di Husticia lo trata e caso penal cu Ministerio Publico a cuminsa contra tres cuidador di preso, kendenan ta wordo sospecha di a pasa droga y otro

cosnan den KIA. E tres sospechosonan homber ta: J.G., D.M. y G.L.

SOLO DI PUEBLO por a compronde cu tur tres sospechoso ta sera na Bonaire pa nan seguridad.

Tur tres sospechoso ta

sera na Bonaire y tur cos ta muestra cu via video conference lo atende e caso cu ta un “regie zitting”.

Den video conference e abogadonan di e sospechosonan lo ta den sala di Corte hunto cu Fiscal

y Hues, mientras cu e sospechosonan lo ta den un oficina na prison di Bonaire. Via screen ta mira otro y comunica cu otro.

Tambe ta asina cu tratamiento di e caso lo no tuma lugar sino entre aboga-

donan y Fiscal lo bay palabra ki investigacion(nan) ainda lo mester tuma lugar promer cu e tratamiento di e caso mes tuma lugar. Por ta cu lo bay palabra un fecha pa e tratamiento di e caso tuma lugar.

Minister Ursell Arends:

OLA DI CALOR TA PELIGROSO PA ADULTONAN MAYOR

Ministerio di Adultonan Mayor a yama un reunion pa evalua e peligro cu un of mas ola di calor (“heat wave”) lo trece pa adultonan mayor den e temporada nos dilanti.

“Como Minister di Naturalesa mi ta sali for di e punto di bista cu cambio climatico ta un realidad,” Minister Arends a bisa, indicando cu Nacionannan Uni a confirma cu 2023 a kibra tur record mundial pa loke

ta temperatura halto, no obstante cu 2023 a cumpli 10 aña consecutivo di aumento di temperatura.

“Ciencia ta bisando nos cu aña 2024 lo kibra tur record mundial di temperatura halto,” Minister Arends a bisa. “For di mi ministerio nos ta mira e impacto di e cambio climatico den diferente parti di nos naturalesa, pero loke ta preocupa mi mas cu tur ta e impacto cu esaki por

tin riba nos adultonan mayor.”

“Como minister di adultonan mayor mi ta preocupa pasobra calor sofocante por bira fatal pa esnan mas vulnerabel, entre nan nos adultonan mayor lo ta e promenan pa sinti e efecto,” segun Minister Arends. E minister ta enfatisa cu e asunto aki mester atencion serio.

Aunke Gobierno no



por trece cambio den temperatura mundial, nos mester haci tur esfuerso pa mitiga e impacto di esaki riba esnan mas vulnerabel. Pa e motibo aki Minister a yama un reunion di urgencia cu diferente instancia cu ta atende di un of otro forma cu adultonan mayor. Meta di e reunion ta pa hunto cu tur instancia yega na un plan di accion y cooperacion. Tur esnan

cu ta atende cu adultonan mayor mester traha hunto pa evalua e peligro y prepara un plan con pa mitiga esaki.

Ministerio di Adulto Mayor y Naturalesa ta dunando espacio pa discusion riba e peligernan di Cambio Climatico, pero sigur riba e peligro cu un heat-wave lo trece pa nos adultonan mayor.

Prome Minister Evelyn Wever-Croes:

PRESIDENTE DI FUNDACION AUTISMO ARUBA A REUNI CU PROME MINISTER

Lo crea un maneho nacional na bienestar di e comunidad autista

ORANJESTAD – Diaranson 15 di mei, Presidente di Fundacion Autismo Aruba (FAA), señora Carolina Thiel-Span a reuni cu Prome Minister Evelyn Wever-Croes pa un motibo hopi special. Presente pa e ocasion aki tawata Minister di Salud Publico y Turismo, señor Dangui Oduber y Minister di Husticia y Asuntonan Social, señor Rocco Tjon. Durante e atardi aki, e Comision Nacional di Autismo, cu a wordo lanta un par di aña pasa, a wordo re-institui cu cambianan importante y a apunta e presidencia na Fundacion Autismo Aruba. E Comision Nacional di Autismo lo tin varios



profesional formando parti di dj'e, entre otro, profesionalnan di e area di salubridad y den e area social y hunto lo crea un maneho nacional na bienestar di e comunidad autista. Esaki ta un logro grandi cu a wordo haci posibel door di e

interes grandi di Prome Minister di Aruba y otro ministerionan y departamentonan di Gobierno. Durante e encuentro aki Prome Minister a enfatisa cu ta wordo calcula cu na Aruba tin entre 3000 pa 5000 persona cu autismo.

Gobierno ta bay traha riba un plan nacional hunto cu Fundacion Autismo Aruba. E fundacion recientemente a participa na un foro internacional titula "Call to Action" na Nacionnan Uni, New York cu e meta pa boga pa un miho futuro pa

personanan autista na Aruba. E biahe aki a duna bon resultado y awo FAA tin mas y miho contacto y colaboracion cu stakeholders internacional.

"E colaboracion aki sigur ta contribui pa por crea un miho plan y asina Aruba por mehora e calidad di bida di nos ciudadanonan cu autismo, promoviendo mas inclusion den nos comunidad y logra un miho sociedad pa biba den dj'e. señora Carolina Thiel-Span ta na cabes di Fundacion Autismo Aruba y ta esun cu awo lo dirigi e Comision Nacional di Autismo y mi tin tur confiansa cu den su man nos lo ta exitoso", Prome Minister a expresa.

Prome Minister Evelyn Wever-Croes:

CONSTRUCCION DI HOTEL SECRETS TA AVANSANDO HOPI LIHE

"Meta ta pa habri e prome 300 cambernan pa fin di aña"



ORANJESTAD – Diaranson mainta 15 di mei, Prome Minister Evelyn Wever-Croes hunto cu representantenan di

DOW, a bishita e sitio unda cu Hotel Secrets ta wordo construi na San Nicolas. Motibo di su bishita tawata pa observa con e

proyecto ta avansando. For di e representantenan di Hotel Secrets, Prome Minister a haya splicacion amplio di e diferente

fasenan di e proyecto. Tambe nan a notifica Prome Minister cu pa fin di 2024, nan lo kier keda cla cu e construccion di e prome 300 cambernan y habri esakinan prome cu aña caba.

Prome Minister a indica cu e Proyecto ta progresando bastante bon y ta muestra cu lo logra nan meta pa fin di aña. Apesar cu e Proyecto aki a sufri hopi tardansa pa motibo di e diferente discusionnan cu tawata tin su rond, mester a coregi varios asunto na caminda pa asina acapara e preocupacionnan di tur hende.

"Sinceramente, Hotel

Secrets na San Nicolas ta un proyecto sumamente grandi pa Aruba en general pero especialmente pa San Nicolas. Cu e inversionistanan priva a mira un luga pa nan pone nan riesgo, inversion y nan placa pa trece un desaroyo pa Aruba, ta algo cu nos ta aprecia hopi, especialmente pasobra esaki ta bay trece e progreso y bienestar pa esnan cu ta biba paribi'brug, cu ta algo cu ta haci ami hopi contento. Mi ta hopi impresionado con lihe e construccion ta bayendo y mi ta sigur tambe cu pa fin di aña e hotel ta keda cla pa habri su prome 300 camber", Prome Minister a expresa.

E BON NOTICIA HENDE NO TA NACE DI E MESUN SEXO, PERO HENDE TA NACE ENTRE HOMBER Y MUHER

Cada hende na mundo ta nace di un pareha, di homber cu muher. Un famia ta wordo lanta pa medio di tata y mama. Y bo mes, di unda bo ta kere cu ba bini? Den Bijbel Genesis 2: 4-24, na principio di creacion, Dios Tata a traha homber y muher, nan nomber ta Adam y Eva. Dios Tata a traha homber y muher, pa procreacion humano. Tambe nos por lesa den Bijbel Marco 10: 6 – 9, na unda Cristo Hesus ta bisa: “Na principio di creacion Dios a traha homber y muher, p’esey e homber lo laga su tata y su mama pa e uni cu su muher y nan dos lo bira un solo curpa.” Akinan Dios ta

uni e homber y e muher den enlaso Matrimonial, pa nan haci nan relacion sexual y pa nan lanta famia. Den e union aki, di homber y muher, e yiunan ta sigi e ehempelnan di nan tata y di nan mama. Dia cu e yiunan bira grandi, nan tambe ta casa pa lanta famia, mescos cu nan tata y nan mama. Awor, ta di unda ta bini cu homber cu homber y muher cu muher, kier e union di e mesun sexo y casamento? Den Bijbel Genesis 19: 1 – 23, pakiko Dios Tata a destrui y a caba cu tur e habitantenan den e ciudadnan grandi di Sodoma y Gomorra cu candela y azufre? Pasobra e ciudadnan di Sodoma

y Gomorra tabata habita pa homosexualnan y lesbiananan. Den Bijbel Romanonan 1: 24 – 32, na unda Dios Tata a destrui y a caba cu tur e habitantenan di Sodoma y Gomorra, pa motibo di nan mal pasionnan cu e diabel a hinka den nan curason, den deseonan impuro. Di manera cu nan a deshonor nan mes curpa, nan a cambia e berdad di Dios pa mentira y nan a honra y adora idolonan, nan lugar di Dios Creador. Nan muhernan a cambia tradicion natural pa esun contra naturalesa. Mescos tambe, hombernan a kita tradicion natural cu muhernan y a inflama nan mes den pasion cu

hombernan. Hombernan ta comete deshonestidad cu hombernan. Asina nan ta haya den nan mes, e castigo mereci pa nan errornan. Nan ta yen di tur sorto di inhusticia. Nan ta haya, cu no ta bale la pena pa reconoce Dios. Maske cu nan ta reconoce e sentencianan di Dios, nan ta obra den maldad y p’esey nan ta merece morto. Nan mes ta haciele concientemente y nan ta aplaudi na esnan cu ta hacie tambe. Nan ta stroba Dios Su procreacion humano door di nan inmoralidad y deshonesto, den oral y anal sex. Den Bijbel Genesis 19: 1 – 23, na unda tur e hombernan (homosexualnan) di Sodoma a rondona e cas di Lot y nan a bisa Lot: “Na unda e dos hombernan ta, cu a yega bo cas anochi? Sacanan afo, pa nos tene relacion sexual cu nan.” Lot a bisanan: “Mi ta roga boso mi rumannan, no comete tal maldad aki.” Aki nos por comprende, cu e dos hombernan cu a bin na cas di Lot, nan tabata Angelnan di Dios, cu a bin pa trece

husticia y castigo y Dios a castiga e habitantenan inesperadamente. Akinan nos por mira, con grandi e ofensanan y e pikanan di inmoralidad y deshonesto tabata ta, cu Dios Tata a kita bida di tur e habitantenan. Bijbel Levitico 20: 13: “E homber cu drumi cu un homber manera cu ta drumi cu un muher, nan dos ta comete actonan repugnante, nan dos lo muri y nan sanger lo cay riba nan.” Bijbel Levitico 18: 22: “Lo bo no tin relacion sexual cu un homber manera cu sa haci cu un muher, esey ta algo abominabel.” P’esey, no bini cu e leynan di Sodomitanan pa e pueblo di Aruba, pasobra e leynan aki ta bini for di abismonan di fierno, pa desvia e pueblo den perdicion di condenacion mescos cu Sodoma y Gomorra. Bin cu un Referendum mas pronto cu ta posibel, pa e pueblo di Aruba mes dicidi. Pasobra bos di pueblo ta bos di Dios.

E ora ey, bosonan lo mira cuantor tin.
Seferino Tromp

IBiSA ta informa ATENCION PA BO PRESION RIBA DIA MUNDIAL DI PRESION HALTO

Dia 17 di mei ta dia mundial di Presion halto. Riba e dia aki ta pone atencion riba e importancia di un bon control di presion. Tur aña ta scohe un topico y e aña aki e ta: ‘Midi bo presion riba e manera adecua, control’e y biba mas largo’. Sigun e ultimo investigacion di salud, na Aruba e cantidad di persona cu ta

sufri di presion halto ta alarmante. Bo tabata sa cu presion halto ta e contribuyente mas grandi pa haya malesanan di curason y ader e asina yama malesanan cardiovascular? Segun Pan American Health Organisation (PAHO) tin 1.6 miyon morto tur aña den region di America

pa motibo di malesanan cardiovascular. Mitar di e cantidad di morto ta wordo considera prematuro y cu por a wordo preveni. Por preveni of pospone (consecuencianan di) presion halto dor di baha man na salo, come suficiente fruta y berdura, haci movecion y mantene un peso adecua. E desafio pa baha man na salo ta



cu e cantidad mas grandi di salo cu nos ta come ta bin for di cuminda (ultra) procesa manera entre otro cuminda di ‘fast food’, chips, pizza, keshi, Spam, soseishi. No ta asina facil pa wak e cantidad di salo den e alimentonan aki. Pesey ta importante pa cushina mas tanto bo mes y tambe pone atencion riba e label di productonan di alimento cu bo ta usa pa su contenido di salo. Otro punto importante

pa evita consecucionan di presion halto ta pa Sa Bo Number di presion. Ta urgi tur adulto pa controla bo presion di sanger regularmente 1-2 biaha pa aña of sigun recomendacion di bo dokter di cas. Si bo ta bebe remedi di presion halto percura bo bebe esaki segun prescripcion di bo especialista, dokter of Praktijk Ondersteuner Huisartsen (POH).

TUR AÑA 17 DI MEI NOS TA CELEBRA WORLD TELECOMMUNICATION AND INFORMATION SOCIETY DAY

Pa construi un futuro sostenibel ta existi un pensamento innovativo y accion, specialmente den e mundo digital. World Telecommunication and Information Society Day ta un chens pa explora con innovacion digital por yuda conecta tur hende y trece prosperidad pa tur.

Celebra tur aña riba 17 di mei, e fecha aki ta marca e fundacion di e International Communication Union (ITU), cu ta specialisa

den tecnologianan di informacion y comunicacion (ICTs). E tema pa e aña aki ta "Digital innovation for sustainable development", pa forma un futuro mas inclusivo y sostenibel.

Innovacion digital ta importante pa e progreso economico y desaroyo global. Innovacion a bira sinonimo di oportunidad pa crecemento y solucionnan pa retonan social urgente. Tecnologia innovativo por yuda pa

enfrenta retonan mundial manera cambio climatico y te hasta eliminacion di hamber y pobreza.

De facto, ITU ta di opinion cu tecnologia digital por yuda pa logra 70% di e Sustainable Development Goals (SDGs) di Nacionan Uni pa 2030. Sin embargo, digital gaps existente ta stroba innovacion na hopi partinan rond mundo pa falta di maneho, inversion y digital skills.

Pa SETAR, como nos compania nacional di telecomunicacion, ta importante pa enfoca riba nos Corporate Social Responsibility como compania y con nos ta aporta na e desaroyo sostenibel di nos pais.

SETAR ta aporta, entre otro, por medio di ofrece Aruba lo ultimo den innovacion digital door di haci inversionnan continuo den tecnologia, infraestructura y

solucionnan innovativo como tambe door di aporta na conocimiento y digital skills.

E esfuerso di SETAR no ta solamente den tecnologia y conexion; pero SETAR ta aporta cu posibilidad, crecemento y ta crea progreso pa tur hende. SETAR ta keda firme den su mision pa sigui inverti den e futuro di Aruba por medio di innovacion, colaboracion y na un manera sostenibel.

POLIS A DETENE DAMA CHAUFFEUR BURACHI CORIENDO AUTO MASHA MALO TRECIENDO TRAFICO DEN PELIGER



Dialuna madruga durante patruya polisnan atento a tuma nota di un auto Kia Picanto coriendo masha malo mes treciendo trafico na peliger, pa su mesun bon

polis a para e auto na altura di Hato. Eynan a bin ripara cu aki ta trata di un dama chauffeur bao influencia, mesora a detene y a hib'e warda di polis.

World Telecommunication and Information Day 2024

INNOVATE FOR PROSPERITY

Building a better digital future for generations to come.

SETAR
setar.aw | Teleshops

REACCION RIBA MIGGUEL MANSUR SU DESEO PA MANDA GRIFFIER CAS

Apreciabel voorzitter,

Mi a tuma nota di e carta di colega Miguel Mansur pidiendo un reunion di CHA pa considera ontslag di Griffier di Staten, mr. Herman Hek. E peticion aki simplemente ta un reaccion riba e resultado di e reunion publico di dia 8 di mei 2024 pa trata e ley di matrimonio homosexual. E dia ey Miguel Mansur, Marisol Tromp, Mervin Wyatt-Ras y Gerlien Croes a bira hopi altera rond di e cuestion di e posibilidad di abstencion y su efecto riba e votacion y awor e ta cuestiona señor Hek su integridad y competencia pa informa Staten encuanto e reglanan tocante votacion. Mansur c.s. no tabata habri pa ningun discusion racional y ya caba tabata lansa yen acusacion y menasa durante reunion di dia 8 di mei y despues di e reunion nan a sigui riba mesun pia. Sin ningun base Gerlien Croes a acusa MEP y AVP riba Facebook di a haci un complot pa perhudica e ley di pasa. Mansur na su turno a menasa Arthur Dowers cu e no por bira minister di Husticia den un gobierno di Accion21, pasobra Dowers a vota contra e ley y segun Mansur e voto contra tabata un violacion di nos Constitucion.

Ta importante pa señala cu – independientemente di e hecho cu Mansur aparentemente no ta compronde e regla di colision cu ley mas halto ta prevalece sobre ley mas baho (lex superior derogat lege inferiori) – Mansur den su carta no ta duna ningun evidencia con Griffier a gaña y cu

el a actua cu intencion di engaña. Asina kier castiga Griffier completamente basa riba speculacion. Ademas ta importante pa splica e reglanan manera nan ta y splica e manera con dia 8 di mei 2024 e bloke di Miguel y Marisol a haci politikeria cu cuestion di abstencion di voto durante un reunion publico.

Abstencion y su efecto riba e votacion

Tin dos regla cardinal pa un reunion publico: (1) mester tin por lo menos 11 parlamentario pa por reuni durante henter e reunion y (2) e mayoria di e votadornan ta dicidi riba proposicionnan. Durante e votacion un parlamentario por abstene di vota. Den e caso ey e abstencion no ta conta como voto na favor of contra. Esey ta nifica cu e abstencion no tin influencia riba e resultado final di e votacion.

Si 21 parlamentario t'ey den un reuniony 10 ta vota PRO, 8 ta voto CONTRA y 3 ta abstene. E proposicion ta keda aproba cu 10 voto PRO y 8 voto CONTRA.

E motibo pakico abstencionnan no ta conta, ta pa no castiga e votante neutral. Un hende por scohe pa abstene pa motibo di no ta sigur di lo que nan ta opina riba un propuesta. Si e abstencionnan tabata conta como voto CONTRA, e personanan aki ta wordo obliga pa tuma un posicion cu nan no ta sinti nan mes comodo cu ne.

Error den e pensamiento di e bloke di Miguel y Marisol Miguel y Marisol apresumi cu hopi hende di parti di

MEP lo a abstene di vota pa warda e veredicto den Cassatie. Tambe nan a asumi cu Dowers lo a vota PRO. P'esey nan a spera un resultado hopi diferente:

- 7 voto CONTRA: do Nascimento, Berlis, Tevreden, Hoek, Guedez-Erasmus, Molina y Eman;

- 4 abstencion: Yarzagaray, Tromp Lee, Vrolijk y Vallejo;

- 10 voto PRO: pasobra nan tabata contando riba e sosten di Dowers.

Kiermen cu nan tabata spera un victoria confortabel di 10 voto PRO y 7 voto CONTRA.

Panico pa perde

Den e seniorenen convent voorzitter a parti un documento den cual a resumi e leynan importante cu ta goberna e reunion. E documento tambe tabata contene opinionnan di un commissiegriffier di Hulanda, griffier di Sint Maarten y director di DWJZ. Dos parti den e documento a pone e bloke drenta den panico. Un ta unda e commissiegriffier ta splica cu na Hulanda nan ta vota door di hisa nan man. Esey kiermen cu si bo no vota PRO door di hisa bo man, automaticamente bo ta wordo conta como di a vota CONTRA. P'esey, si un parlamentario Hulandes kier abstene di vota e mester bandona sala. Ta importante pa señala cu mientras na Hulanda ta custumber pa vota door di hisa nos man, na Aruba nos custumber ta di vota door di bisa e palabra "PRO" of "CONTRA".

E otro parti di e documento cu a trece panico ta unda



cu e director di DWJZ ta bisa cu tur hende mester vota, pero cu bo no por obliga ningun hende di vota. Si nan ta keda sinta den sala toch "bo por cont'e den e total di stemmen pa determina e volstrekte meerderheid". E interpretacion cu e bloke Miguel y Marisol a duna na e documento ta cu voorzitter lo conta tur abstencion como voto CONTRA. Di biaha nan a mira un pelicula di terror den nan cabes: nan a soña cu voorzitter lo a conta e 7 voto CONTRA hunto cu e supuesto 4 abstencion. Den nan mente nan a scucha Edgard Vrolijk anunciando 10 PRO y 11 CONTRA: e ley a keda rechasa.

E atake di Marisol

P'esey Marisol Tromp a lidera un atake riba e voorzitter. Marisol a keda bende e idea cu MEP kier a sabota e resultado di e votacion y cu Vrolijk tabata planeando pa viola un regla legal hancra den nos Constitucion y Reglement van Orde. Marisol a bisa cu e regla legal ta cu esun cu kier abstene di vota tin e obligacion legal pa bandona sala di

parlamento.

Sin embargo, esaki no ta nada mas cu un regla spirito. Ora bo ta lesa henter nos Constitucion y henter nos Reglement van Orde di Parlamento bo no por haya ningun regla asina. Como cu Marisol no por mostra den cual articulo su supuesto regla ta para, e ta bisa: esey ta e custumber, semper nos a haci e asina. Asina Marisol ta zona mescos cu Paul Croes, Benny Sevinger y Otmar Oduber ora ta trata di practicanan corruptivo: semper nos a haci e asina. So what...?

El tiro les salio por la culata

Henter e discusion aki ta estúpido y no ta haci ningun sentido. E dolo no ta e cuestion di abstencion di voto. E motibo pa busca revancha riba Griffier ta cu Miguel no tabatin 11 voto PRO y p'esey su ley no por a pasa.

Atentamente Top of Form Aten

Rycond Santos do Nascimento
Miembro independiente di Parlamento



GRAN FESTIVAL DI RANCHERA DIA 01 JUNI 2024

CELEBRANDO 38 AÑA DEN RADIO DIFUSION NA ARUBA CU CECILITO LOPES



y lo wordo acompaña pa Mariachi Reyes di Aruba bou encargo di Ernan Angela y lo celebra 38 aña den Radio difusion cu Cecilito Lopes, lo tin categoria A y B y diferente doorpricesnan pa tur esnan presente. e anochi aki lo tin diferente sorpresanan durante e festival.

Bar y Cushina lo ta bon surti y sigur nos lo celebra engrande locual cu Aruba ta enespera di dje. nos ta gradici tur nos casnan comercial cu a juda pa premionan di e anochi aki y alavez tur esnan cu ta buscando carchinan di entrada cu ta unicamente 35 florin y 2 mucha cu un carchi.

Por hanja carchi cumpra serca tur nos Cantantenan y na nos Outlethan cu ta Gallo Royo na Sanicolas, Citgo Sta Cruz, Shaba Pastry den e barrio di Noord y na The Coffee Table Ariba LG Smit Blvd, ANDALE ANDALE ANDALE NOS TA WARDABO

1 JUNI 2024

FESTIVAL DI CANTO DERA GAY

BAN APOYA NOS MUCHANAN Y HUNTO NOS TA CANTA "DERE GAY DERE GAY"

CATEGORIA

- 5 - 7 AÑA
- 7 - 9 AÑA
- 10 - 12 AÑA

PREMIO

- GANADOR ABSOLUTO FL.500,=
- SEGUNDO LUGAR FL.250,=
- TERCER LUGAR FL.150,=

ORARIO: 6:30 PM - 11:30 PM
 LUGAR: CENTRO DI BARIO BRAZIL
 ENTRADA: FL.10,= PA ADULTO

ENTRADA PA TUR MUCHA TA GRATIS!



OBJECTIVE
REALTY ARUBA



**DEPARTAMENTO
DI CULTURA ARUBA**

BO YU KIER PARTICIPA?
 TEL: 564 6099 POR INSCRIBI TAMBE NA EMAIL: FUPROCUNO2@GMAIL.COM

Dia Prome di Juni 2024 Aruba ta keda Cordialmente invita pa e Gran Festival di Ranchera

na Club Caiquetio na Paradera cuminsando pa 8.30 anochi cu 30 Cantante compitiendo contra otro

ATIA HUNTO CU DEPARTAMENTO DI IMPUESTO CU SESION INFORMATIVO Y PRACTICO RIBA TOPICO DI IMPUESTO RIBA GANASHI DI COMPANIA



ORANJESTAD – Ariba 15 mei 2024, Aruba Trade & Industry Association (ATIA) hunto cu Departamento di Impuesto (DIMP) a organisa nan segundo sesion informativo y practico exclusivamente pa miembronan di ATIA. E biaha aki e topico tawata digitalizacion di Impuesto riba ganashi di compania (“winst belasting”[WB]). “DIMP a informa ATIA den un reunion na Januari cu lo bai digitalisa e proceso di declaracion di WB”, director di ATIA Sr. Herrick Henriquez a splica. Ora nos a wordo informa di esaki, mesora a tuma e iniciativa pa puntra pa organisa un sesion pa nos miembronan ora ta mas cerca di e fecha di implementacion.

Sesionnan asina ta importante pa no solamente facilita y informa nos miembresia, pero tambe pa segura cu nos miembronan cumpli cu tur rekisito pa entrega nan WB na tempo. Den un sala yen di comerciante representando diferente sector, Directora di DIMP, Sra. Luenne Gomez-Pieters y su team, no solamente a duna un splicacion amplio ariba e cambionan di WB, pero tambe a repasa e manera nobo pa entrega e WB den nan sistema di Bo Impuesto (BOi). Awe 16 di Mei ta Lanza oficialmente e documento nan digital den BOi. Pa facilita tur pagador di Impuesto, DIMP a crea un “helpdesk” specialmente pa cu e WB

online. Pa informacion of ayudo por yama 522-7438, of e-mail wbonline@impuesto.aw. E iniciativa aki no ta e prome cu ATIA a hasi cu DIMP, pero na Maart tawata tin un sesion cu topico di BBO na Frontera cu tawata completamente yen. E sesion menciona anterior tawata uno cu a hasi como prueba, pero door di e acogida sumamente exitoso a dicidi pa hasi mas sesion asina pa miembresia di ATIA. Director di ATIA a indica cu “e meta di sesionnan asina ta pa trece comerciante mas cerca di DIMP y asina crea un conexion y relacion mas personal cu Management Team di DIMP, pa asina por cumpli cu tur deber pa ta un comerciante

ejemplar. Tin cu bisa cu e participantenan a sugeri pa hasi sesionnan asina mas biaha pero tambe ariba otro temanan manera impuesto riba salario (“loonbelasting”), e ley di WB y BBO en general. Directora di DIMP a informa cu lo ta dispuesto pa organisa sesionnan asina regularmente. ATIA ta satisfecho cu e resultado di e segundo sesion y ta gradici Directora di DIMP y su team pa nan tempo y pa host e sesion na Oficina di DIMP. ATIA ta invita tur comerciante y miembro pa keda pendiente pa e siguiente sesion cu nos lo anuncia riba nos rednan social. Si tin pregunta of kier mas informacion di miembresia y su

benifisionan, por semper tuma contacto cu e team di ATIA.

A T I A Aruba Trade and Industry Association (ATIA) a wordo funda na aña 1945 y ta e organizacion principal cu ta representa empresanan, empresarionan y comercio na Aruba. E meta di ATIA ta pa defende, promove y proteha e interesnan di su miembronan y comercio di Aruba en general. Pa mas informacion por bishita www.atiaruba.org y nos rednan social www.facebook.com/arubatrade, www.instagram.com/atiaruba, y <https://www.linkedin.com/company/aruba-trade-and-industry-association>

RESUMEN DI CAS BON TAEKWONDO CUP



Cas Bon Taekwondo Cup ta e prome campeonato cu Brazil Taekwondo Stichting a organisa pa aña 2024. Den Cas Bon Taekwondo Cup por a mira un diferencia grandi den e atletanan cu a participa y tambe den nos refereenan Internacional y local Master Augie Tromp y Master Eric Barry.

Master Clifford Rasmijn a cuminsa cu su prome reto di organisa campeonato sin ayudo di Alberto Klaber cu a laga tur cos bou encargo di Clifford Rasmijn. Despues di e evento Clifford Rasmijn a keda satisfecho cu e resultado di Brazil Taekwondo Stichting cu ta focus hopi ariba e new generation cu ta e futuro di mañan.

Awo Brazil Taekwondo Stichting ta preparando pa Aracari Taekwondo Cup cu ta e di dos campeonato pa cualifica pa Best of the Best 2024 unda cu USA, Surinam y Corsou a confirma nan participacion y ta haci cu Best of the Best ta keda un evento grandi.



Paardenbaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 16 Mei 2024 Merdia		
Sorteo # 4267	Sorteo #	Joker Letter
5702	0 x Jackpot	Proximo Jackpot
8822	0 x Match 4+	320.000,-
3604	0 x Match 4	
	0 x Afli 12,00	
Sorteo # 4267	Sorteo #	Proximo Jackpot
8930	0 x Jackpot	51.000,-
	0 x Match 4	
	0 x Afli 8,00	
Sorteo # 2323		
3703		
Sorteo # 4267		
7093		
Tauro		
Sorteo # 1141		
564		
X2		

Paardenbaistraat 10, Oranjestad, Aruba Tel.: (297) 525 - 7555 www.lottoaruba.com Resultado : Sorteo 15 Mei 2024 Anochi		
Sorteo # 8242	Sorteo # 2492	06-13-14-15-24
5010	0 x Jackpot	Joker 01 Letter F
8726	0 x Match 4+	Proximo Jackpot
8310	8 x Match 4	320.000,-
	278 x Afli 12,00	
Sorteo # 7286		
8532		
Sorteo # 1991		
5288		
Sorteo # 6045		
4445		
Tauro		
Sorteo # 975		
761		
FP		

JAMES FINIES TA LIDERA E ORGANISASHON DI DERECHO HUMANO NA ABOGASIA I PROMOSHON MUNDIAL



Riba 15 mei 2024, James Finies lider di Pueblo Progresivo Uni, hunto Davika Bissessar di Bonaire Human Rights Organization I Movimento Pa Kambio eksistosamente a konklui un seri dinamiko di konferensianan, presentashonan, reunionan I kompromiso ku media atravez di Oropa. Su organisashon, Bonaire Human Rights Organization, impulsa pa e mishon “Bonaire Lives Matter” a embarka riba un trajekto transformativo luchando pa derechonan humano I prinsipionan demokratiko.

Durante nan gira Oropo, Finies I su team a reuni ku Sr Ady Thijsen, Minister Plenipotensario di Aruba na Hulanda, a kompremete su mes ku e diaspora di ex- Antia Hulandes, I inklushon di BHRO komo miembro di Desendientenan di Hendenan Afrikanu Oropo su Rountable Oropo I tambe di Global Strategic Litigation & Advocay Network I entrevistanan ku varios medio di komunikashon, inkluyendo e famoso Pika Pika Talkshow, Mart Radio di Hulanda, Afro Magazine I korantnan na Geneva.

Atravez di e interakshonan aki nan a ekspone e varios violashonandiderechonan humano ku ta sosediendo na Boneiru I nan abogasia pa Boneiru wordu inklui riba lista di Teritorionan Sin Propio Gobernashon di Nashonan Uni.

Den un momento historiko James Finies a firma karta di rekomendashon

huntu Ambassador David Comissioning di Barbados na CARICOM na Forum Permanente di Hendenan di Desendensia Afrikanu na Geneva, Suisa, urgiendo e inklushon di dekolonisashon di e resto di teritorionan Karibense komo prioridat den e agenda pa e proksimo dekada. Adishonalmente e la reuni ku figuranan distingui manera Profesor Verene Shepherd, Presidente di e Komite pa Eliminashon di Deskriminashon Rasial di Nashonan Uni I Dr. Barbara Reynolds, Presidente di Grupo di Trabao di Ekspertonan riba Hendenan di Desendensia Afrikanu, asina fortaleciendo mas aun e esfuersonan pa hasi e kaso di Boneiru konosi na mundu.

Sr Finies su dedikashon pa transforma Boneiru

den un luga di paz pa e pueblo ta evidente. Apesar ku e populashon lokal ta agotando I falta di liderazgo pa atende e problemanan kritiko, inkluyendo akusashonan di korupshon kontra lidernan lokal, Finies ta sigui desidido den su esfuersonan pa logra hustisia I responsabilisashon.

E oportunidatnan signifkativo aki ta subraya e kompromiso solido di BHRO den promove derechonan humano I prosesonan demokratiko riba eskala mundial. Atravez di su inkansabel lucha I partnershipnan strategiko, nan ta kontinua na promove e kausa di e pueblo marginisa Boneriano I lucha pa un kambio positivo pa e pueblo di Boneiru I mundo kompleto.



OLIVE TREE'S
PRE-PAID
FUNERAL PLAN

PAY AS YOU CAN

Piedraplat ☎ 582 0000
Sanicolaas ☎ 584 8888 | 5820000
Habri dialuna pa diabierna | 8:00am-4:00pm

Olive Tree Social Department ☎ (+297) 743 7411
www.olivetreefuneralhome.com

Horoscop pa dia 17 di mei suerte: 72, 35, 8. Un hende lo purba un



2024

Feliz y productivo diabierna. Awe Solo di Pueblo ta presenta bo horoscop pa dia 17 di mei 2024.

Aries
Tabonpataindependiente, pero laga nan stima bo. Cuidao cu inversion nobo cu nan ta propone bo. Aumento di energia mental, bon pa bo trabao. Hidrata bo cuero bebiendo awa. Number di suerte: 47, 77, 7.

Tauro
Reencuentro cu un amigo bieu. Cumpra un spaarpot pa bo warda loke bo por. Bo eficacia na trabao ta indiscutibel. Tene cuidao cu bo garganta, evita bebida friu. Number di

Geminis
Sea mas flexibel cu e fayonan di bo sernan ker. Probecha cu bo tin un placa extra pa bo haci un fiesta. Prudencia mester impone prome cu un cambio laboral. Un baño cayente anochi lo alivia stress. Number di suerte: 42, 76, 7.

Cancer
Bo mester tuma un decision importante di indole amoroso. Pone un maneho di spaar mas eficaz den marcha. Bo improvisacion ta algo hopi valioso pa bo empresa. Realmente bo tin mas fortaleza cu bo ta pensa. Number di suerte: 52, 41, 3.

Leo

wega sushi cu un amigo di bo: no permitie. Momento pa genra prosperidad economico. No haci bo trabao bo bida. Bon dia pa reduci consumo di alcohol y tabaco. Number di suerte: 73, 91, 2.

Virgo
E dia di awe lo caracteriza pa amargura amoroso. Bo economia lo mehora danki n'e decimo premia. Lucha pa bo interesnan laboral, no laga nan paralisa bo. Cu un esfuerso chikito lo bo baha e kilonan ey di mas. Number di suerte: 48, 32, 4.

Libra
No discuti cu bo pareha, awe ta cu mal beis. Tene cuidao, bo ta gasta demasiado hopi placa. Momento pa lucha p'e promocion. E relacionnan social ta fundamental pa bo estado di animo. Number di suerte: 68, 81, 4.

Scorpio
E relacionnan sentimental ta inmehorabel. Bo ta gastando placa pa loco, ya ta ora pa para. Debi na bo constancia, lo bo logra haya un bon trabao. Come mas, un cos ta bay na dieta y otro cos ta stop di come.



Number di suerte: 84, 41, 5.


Sagitario
E problemanan familiar ta afectando bo caracter. Cu e placa recupera, bo por duna bo mes algun capricho. Na trabao, bo lo ta specialmente habil. Bo ta anda un poco desorienta den bo interior, pero no a nada grave. Number di suerte: 98, 81, 7.

Capricornio
No ta bo miho etapa den pareha, pero tur cos lo pasa. Bon dia pa purba saca mayor probecho di bo placa. E temanan profesional ta rekeri un esfuerso adicional. Si bo no cuida di e verkoud, bo por afecta bo bronkionan.

Number di suerte: 95, 51, 1.

Acuario
Bo ta inspira riba tereno afectivo. Ocasion pa cuminsa cu un maneho di spaar mas coherente. Revisa hopi bon e trabao prome cu bo entrega nan. Bo lo gosa di hopi vitalidad y resistencia. Number di suerte: 91, 84, 3.

Piscis
Ta un dia tremeno pa disfruta cu bo pareha. Pensa den e posibilidad di inverti e placa cu b'a spaar. E trabao anterior ta traduci den resultado positivo. Cansancio acumula ta dificil di vence. Number di suerte: 35, 15, 5.



				2		3		
	6		1				7	
8				6	3			
		1					6	
7		5				9		2
	8					7		
			2	8				7
	5				6		9	
		9		3				

3			8		1			2
2		1		3		6		4
			2		4			
8		9				1		6
	6						5	
7		2				4		9
			5		9			
9		4		8		7		5
6			1		7			3

Delicioso

17-Mei

Order Now

746-3571 - 565-3232

Santa cruz 36

Oké take away..

STOBA:

Rabo di baca

Galiña stoba

A la plancha :

Chicken breast

Porkchop

Boneless chicken leg

Sauce:

Mushroom

crioyo

curry

pinda

ciboyo

Seafood:

Mixed seafood

Fish cutlet

MINIBOX

Spaghetti +Carni mula



BO TA PASANDO DEN BO MENOPAUSA ALGUN TIPS CU POR YUDA BO DEN E FASE TRANSITORIO AKI

menopausa ta un etapa natural den bida di un muhe cu ta marka e fin definitivo di menstruacion y capacidad reproductivo. E ta surgi mas o menos entre 45 pa 55 aña di edad, pero e por varia di un muhe pa otro.

Durante menopausa, ovarionan ta produci menos estrogen y progesterona, cu ta trece un serie di cambianan fisico y emocional den e curpa di e muhe. Algun di e sintomanan mas comun ta inclui:

- Hotflash: Episodionan subito di calor intenso cu por ta acompaña pa sodo y rash di curpa
- Soda anochi: Sodamento excesivo durante anochi, cu por interferi cu sueño
- Cambianan den e ciclo menstrual: E periodonan por bira iregular den frecuencia, duracion y cantidad di fluho.
- Sekedad vaginal: Por tin un disminucion di lubricacion vaginal, cu por causa molestianan durante relacion sexual.
- Cambianan den estado di animo: Alteracionnan emocional manera irritabilidad, ansiedad, depresion of cambianan di humor.
- Problema pa drumi: Dificultad pa drumi of mantene sueño durante anochi.
- Cambianan den cuero y cabey: Cuero mas seco, perdida di elasticidad y cambianan den textura di cabey.

Ta importante pa menciona cucadamuhetaexperimenta menopausa diferente, y no tur lo experimenta tur e sintomanan menciona. Ademas, menopausa por afecta salud di weso y aumenta e riesgo di malesa cardio-vascular dor di e bahada di nivel di estrogen.

A pesar di e retonan cu e por presenta, menopausa tambe por wordo mira como un etapa nobo di bida, yen di oportunidad pa crecemento personal i desaroyo. Cu e sosten apropia, cambianan den estilo di bida y den algun caso terapianan medico, hopi muhe ta pasa den e transicion aki den un manera positivo y saludabel.

Atende menopausa ta encera cuida tanto e aspecto fisico como e aspecto emocional. Aki mi ta laga bo algun sugerencia pa maneha e sintomanan y pasa e etapa aki di bida den un manera mas confortabel:

Habitanan saludabel Mantene un dieta balansa rico den fruta, berdura, gran integral y proteina magro. E ta Limita e consumo di alcohol, cafeina y cuminda picante, ya cu nan por desencadena e hotflashnan. Ademas, keda activo fisicamente cu ehercicio regular por yuda mehora estado di animo, calidad di sueño.

Maneho di stress Practica tecnica di relajacion manera meditacion, yoga of rosea profundo pa reduci

nivelnan di stress. Stress por mostra e sintomanan di menopausa, pa cual ta importante pa haya manera efectivo pa maneha esaki.

Atencion di salud mental: No duda di busca sosten



emocional si bo ta sinti bo agobia pa e cambianan emocional asocia cu menopausa. Papiamento papia cu un terapeuta of un grupo di sosten por duna bo e luga pa comparti bo experiencia y haya e sosten necesario. Corda cu cada muhe ta

experiencia menopausa diferente, p'esey ta importante pa haya e strategianan di cuida cu ta funciona miho pa bo. No duda di papia cu bo dokter si bo tin preocupacion specifico of bo mester di guia riba con pa maneha e sintomanan di menopausa.

Maravillas de la Fe

Bo ta sufri di un malesa nan cu bo no por cura ? Manera artrosis, Alzheimer, demencia, depresión, diabetes osteoporosis, párkinson, insomnio, dolor di barica, weso. Etc

Bo ta sufri di un malesa cu bo no por cura? Manera migren dolo di barika, dolo di wesu, lomba, ect? Bo ta bebe remedi i bo no ta cura? Bo ta victima di bruheria? comunica na MARAVILLAS DE LA FE na 748 56 71

Bo no tin suerte? bo sen no ta yega? Bo ta cumpra number i bo no ta gana? Bo ta bai casino i perde tur bo placa?Invidia, mala suerte? comunica na 748 56 71

Bo tin problema di amor? Bo pareha ta gaña bo? Fracaso, soledat, angustia. comunica na



Comunica na 748 56 71



748 56 71





Dios a tira su mirada den su jardin y a ripara cu falta un flor y a mira cu bo tabata cansa y ela biza bo, tene bo man pa hiba bo descansa den e jardin di roza pa bo sinti e fragancia dushi cu e tin prepara pa bo den e paraíso celestial pa laga bo encontra tur loke ta bunita y keda bunita pa tur hunto termina den tur bunita.

Cu profundo sentimiento y inmenso dolor na nos curason nos ta anuncia fayecimento di nos querida
Esposa, Ruman, Mama, Wela, Bisawela stima.



Sra Vuida Regina Flanegin-Willems

*15-07-1942 - *13-05-2024
Su casa den feliz memoria
Crecenciano (Chano) Flanegin.
Tata di su yui den feliz memoria
Bernadeto (Dechi) Tromp.

Na number di su:
Yiu: Janine y Danielo Croes.

Mescos yiu nan:
Ruben Tromp, Sra y yiu.
Maria y Robert Vrolijk
Ludwig, Ana Maria Flanegin y familia
Alan, Richinelly Flanegin y familia
Eugene Flanegin, Marisela Maduro y familia
Suyenne, Bruce Flanegin y familia

Nieto/a nan:
Jadrienne y yiu nan.
Desireen Rosel, Luigi Peña y yiu nan.
Andree Rosel, Marjorie Habibe y yiu.

Mescos nieto/a nan: Maria Jose (Mary) Vrolijk, Romayra Vrolijk, Michael Vrolijk y Michaeline Vrolijk.

Ruman nan:
Cornelia Maduro y familia.
Yuyu, Hendrik Croes y familia.
Carmen, Lucindo Dabian y familia.
Sita Roos y familia.
*Francisco Willems y familia.
*Vicente Willems y familia.
*Victoriano Willems y familia.
*Florencio Willems y familia.

Swa y Cuña nan:
*Bertha y Godfried Yarzagaray Flanegin y yiu nan.
Victoriano (Buchi) y *Libia Flanegin Willems y yiu nan.
Rudolfo (Rufo) y Mathilde Flanegin y yiu nan.
*Estebanita (Chichi) y *Camilo Henriquez Flanegin y yiu nan.
*Digna (Deta) Flanegin y yiu nan.
Jesusita (Sita) Flanegin y yiu y demas familia.
Anthony (John) Flanegin.
Francis (Fenchi) y Jacqueline Flanegin Schonherr y familia.
Mireya y Leonte Amaya Flanegin y yiu nan.

Sobrin/a nan: * Milda Maduro, * Franklyn Maduro, * Robby Maduro, Maikel Maduro, Judith Tromp, Ricky Maduro, Mildenny Croes, Hendrik Jesus Croes, Judelly Zavalla, Ludwin Dabian, Aldrin Roos, Aymar Roos, Amelaine Roos, Francisco Jr Willems, Mariska Celestina, Stuart Willems, Jozef Willems, Vincent Willems, Noraima Willems.

Bisanieta/a nan: Mayron, Dayron, Tyrone, Dayrenne, Jay-nah, Tyrenne, Jaydyllenne, Cay-Yenne.

Demas Familia nan: Willems, Flanegin, Tromp, Croes, Rosel, Maduro, Dabian, Roos, Goitia Partida, Vrolijk, Peña, Habibe, Celestina, Zavalla, Servud, Kock, Trimon, Robert, Wever, Albertsz, Restrepo, Vaca, Ruiz, Franken, Comenencia, Bernabela, Loeffstop, Donata, Wester, Holsman, Erasmus, Bomba, Cordero Puyosa, Garcia, Amaya, Navas, Schonherr, Yarzagaray, Henriquez, Roga, Julia

Nos disculpa si nos por a lubida un familia den nos tristeza.

Ta invita demas familia, amigo(a)nan y conocirnan pa asisti na e acto di entierro cual lo tuma lugar Diabierna 17 di mei 2024 di 2or pa 4or di atardi na misa Inmaculada Concepcion na Santa Cruz. Despues lo sali pa santana catolico di Santa Cruz.

Nos ta lamenta cu despues di entierro nos no ta ricibi bishita di condolencia na cas

FORTALEZA PA FAMILIA

Scirbi pa Pastor Marcel Balootje

EVANGELIO TA PODER DI DIOS PA SALBACION, PA TUR ESNAN CU TA KERE

Romanonan 1:16 ta para scirbi: Pasobra mi no tin berguensa di e evangelio, pasobra esaki ta poder di Dios pa salvacion pa tur cu ta kere.

Juan 3:17 ta para scirbi: Dios no a manda e Yiu den mundo, pa condena mundo, ma pa mundo wordo salba door di dj'E.

Marco 16:15 ta para scirbi: E a bisa nan: Bay den ter e mundo y predica e evangelio na tur criatura. Esun cu kere y wordo batisa lo ta salba, ma esun cu no ta kere lo ta condena.

E evangelio di Dios ta e insrumento di educacion spiritual mas respeta y responsabel na mundo, pasobra den dje tin poder pa convence hende di nan pica.

Tin hende ta acepta, tin hende no ta acepta, tin ta acepta parcialmente, tin hende ta rechasa completamente y kier continua den e bida di inmoralidad, violencia etc.

Tin hopi ta haci cherche, hopi ta haci bofon, tin hopi ta pretende cu nan por dicidi pa nan mes y cu Dios no tin nada di bisa den nan bida, pero tin un versiculo cu ta contradeci tur pensamiento cu ta den rebeldia contra Dios, y ta para scirbi den Juan 3:36: Esun cu ta kere den e Yiu tin bida eterno: ma esun cu no obedece e Yiu lo no mira bida, ma e furia di Dios ta keda riba dj'E.

2 Pedro 3:9 ta para scirbi; Señor no ta tarda cu su promesa, ma E tin pasenshi cu boso, y no kier pa ningun hende bay perdi, ma pa tur bini na repentimento.

Despues cu nos caba di lesa Juan 3: 16-21 nos ta realiza cu e eror di mas grandi cu un hende por haci den su bida , ta ninga di acepta e plan di DIOS pa salvacion den su bida, pasobra un persona asina tin un bida sin ningun speransa.

E evangelio di Dios no ta forsa hende pero e ta splica den un forma hopi facil, cu si bo no acepta e plan di salvacion, cual no ta bini di hende of religion, pero e ta bini di Dios, lo bo no hereda e reino di Dios.

Notable ta cu e enemigo e diabel a hinca hopi smoesjes den cabes di hende awendia, pa nan no sigi Dios, pa nan sigi den e caminda di scuridad y purba hala mas tanto hende cu nan por den mesun caminda

Hecho ta cu ta dos caminda tin esun di lus, cual ta e caminda Dios ta goberna. Y e caminda di scuridad caminda diabel y su compinchi nan ta goberna.

Dios a duna tur hende boluntad propio pa nan por scohe entre bon y malo. Si un hende no scohe pa Cristo Hesus, fierno y laman di candela ta warde, pasobra su number no ta scirbi den e buki di bida (Revelacion 20:15).

Si un hende scohe pa Cristo Hesus, e lo tin bida eterna , ta warde den cielo hunto cu e angelnan.

Pasobra e mensahe di e crus ta locura pa esnan cu ta perese, ma pa nos cu ta wordo salba e ta poder di Dios.(1 Corintionan 1:18).

Y mi mensahe y mi predicamento no tabata cu palabra nan persuasivo di sabiduria, ma cu demostracion di e Spirito y di poder, pa boso fe no wordo basa riba e sabiduria di hende, sino riba e poder di Dios.(1 Corintionan 2 :4).

Nos cas y nos familia, mester di Cristo Hesus, tin hopi mentira ta bay rond, y nos mester para firme contra e planan di e enemigo.

Sinceramente, Pastor Marcel Balootje.

Clasificados



SOLODIPUEBLO@GMAIL.COM
CEL. 585 9500



MOTOCICLISTA A
KEDA PROVOCA
POLIS CU REFMENTO
Y DRAAIMENTO TE CU
ELA DAL ABAO Y A
DETENE



Dialuna madruga den e area di un nightclub na Palm Beach un motociclista cu a tuma nota di presencia di polis a bay provoca polis cu refmento cu draaimento di brommer, na prome instante polis no a worry mucho cun'e pero despues cu e mes a dal abao polis a acerke y a detene ademas a confisca su brommer y e show a caba tambe!



Directiva di Sindicato TOPA

Trahadornan Organiza di Sector Publico di Aruba

Ta extende nos mas sincero condolencia na famia di

"Sra. Olivia Figaroa"

Na bida miembro di Sindicato TOPA

Cu Dios duna su famia hopi forza na e momento difcil aki.

Cu "Olivia" sosega na paz

“No jorami, pero cordami manera con semper mi tabata. No biba rabia, bida ta cortico, al contrario, celebra bida sanamente mas cu bo por y tur dia” – via FB

Canta contento pa Señor, henter mundo; sirbi Señor cu alegria, acerc'E cu cantica di fiesta. Reconoce cu Señor ta Dios, t'E a crea nos y nos ta di djE; nos ta su pueblo, e carnenan cu E ta cuida. - Salmo 100

Cu inmenso tristeza na nos curason, pero conforme cu boluntad di Dios, y pa tur cos cu e la haci y significa pa nos, nos ta participa fayecimento di:

Olivia Virginia Jacinta
Figaroa

Cariñosamente yama: “Otty” of “Oli”
*13-09 – 1957 †15 – 05– 2024



Na number di su:
Yiu:
Agni Figaroa

Rumannan:
Vda. Mildred Figaroa y famia
Evelina y Jan Boonstra y famia
Frida Figaroa y Chico de Kort y famia
Wini y Doppy Arends y famia
Gina y Alecio Maduro y famia
Farida y Freddy Feliciano y famia

Sobrino y Sobrinanan:
Melissa & Anthony y famia
Marc
Timo & Claudia y famia

Elvira
Chantal y famia
Cliff & Ghislaine
Mariel & Chris

Sobresobrino y Sobresobrinanan:
Nina-Andrea, Khloé, Gaël

Nahema & Deirdre
Algin & Lyenne
Jeffray & Zamira

Raydrick & Sasha
Genevieve & Caesar y famia
Kaveri

Primo y primanan, bisiñanan, demas famianan, tur su amistadnan stima na Aruba, Curacao, Bonaire, Suriname, Hulanda y USA, ex-coleganan di Biblioteca Nacional Aruba, UNOCA, OPPA y demas organisacion y insitutonan cu Oliva ta yuda, ta invita pa asisti na e acto di despedida cu lo tuma lugar diadomingo, 19 mei 2024 pa 1or di merdia na Aurora Funeral Home sigui pa un response pa 3.30 pm di atardi.
Conforme deseo di e defunto, cremacion lo tuma lugar den seno familiar mas cercano despues di e response.

Oportunidad pa condolencia lo ta diasabra, 18 mei 2024 na Aurora Funeral Home di 7pm – 9pm.

Enbez di flor of krans, un donacion na Koningin Wilhelmina Kankerfonds, lo ta altamente aprecia. Lo tin un box disponibel pa e bunita gesto aki.

Nos disculpa cu si den nos tristeza nos por a lubida di menciona un of otro famia.

Nos ta lamenta cu despues di e acto di despedida, no ta ricibi bishita di condolencia na cas.

Cu Olivia haña sosiego eterno y descansa na paz den e Paraiso Celestial.